

Ang Balaod sa Ginoo sa Pagpahinungod

Doktrina ug mga Pakigsaad 42:30, 38–39

Doktrina ug mga Pakigsaad 78:3–7

Doktrina ug mga Pakigsaad 105:1–5

Si Elder D. Todd Christofferson sa Korum sa Napulog Duha ka Apostoles mipasabot:



Ang balaod sa pagpahinungod sa Ginoo (tan-awa, pananglitan, sa D&P 42:32, 53) . . . adunay ekonomikanhong bahin apan, labaw pa niana, mao ang paggamit sa balaod sa celestial nga kinabuhi dinhi ug karon (tan-awa sa D&P 105:5). Ang pagpahinungod mao ang paggahin o paghalad og usa ka butang nga ingon ka sagrado, gihalad alang sa balaanong mga katuyoan. Ang tinuod nga kalamposan sa kinabuhi moabot sa pagpahinungod sa atong kinabuhi—kana mao, ang atong panahon ug mga pagpili—ngadto sa mga katuyoan sa Dios (tan-awa sa Juan 17:1, 4; D&P 19:19). Sa pagbuhat niini, gitugotan nato Siya sa pagdala nato ngadto sa atong kinatas-ang kapaingnan. (D. Todd Christofferson, “Mga Hulagway sa Gipahinungod nga Kinabuhi,” *Liahona*, Nob. 2010, 16)

Si Elder Dieter F. Uchtdorf sa Korum sa Napulog Duha ka Apostoles mitudlo:



Ang *sakripisyo ug pagpahinungod* mao ang duha ka langitnong balaod nga atong gisaad nga tumanon diha sa balaan nga templo. Kining duha ka balaod managsama apan dili pareho. . . .

Ang *pagpahinungod* lahi gikan sa sakripisyo sa dili moubos sa usa ka importante nga paagi. Kon kita mopahinungod og butang, dili nato kini biyaan ug kalimtan. Kondili, gamiton nato kini diha sa pagserbisyo sa Ginoo. Gipahinungod nato kini ngadto Kaniya ug sa iyang balaan nga mga katuyoan. Kita makadawat sa mga talento nga gihatag sa Ginoo kanato ug maningkamot sa pagpalambo niini, pilopiloon, aron mas makatabang pa sa pagtukod sa gingharian sa Ginoo.

Gamay ra kaayo nato ang hangyoon sa *pagsakripisyo* sa atong kinabuhi alang sa Manluluwas. Apan kitang tanan gidapit sa *pagpahinungod* sa atong kinabuhi ngadto Kaniya. (Dieter F. Uchtdorf, “Kinasingkasing ang Tanan,” *Liahona*, Mayo 2022, 124)

Unsa man ang balaod sa pagpahinungod? Sa unsa nga paagi kini makaapekto kanako?

Karon, nagsunod kita niini nga balaod sa lain-laing mga paagi. Sama pananglit, moserbisyo kita sa uban, modawat og mga calling ug mga buluhaton sa Simbahan ug mohimo sa atong labing maayo niini, ug mobayad og hingpit nga ikapulog ug ubay-ubay nga halad sa puasa. Kon kita mobuhat sa unsay gisugo kanato sa mga propeta ug sa Espiritu Santo aron sa pagtukod sa gingharian sa Dios ug sa pagtabang sa nanginahanglan, nagpuyo kita sa balaod sa pagpahinungod. (“Unsa man ang balaod sa pagpahinungod? Sa unsa nga paagi kini makaapekto kanako?” *Alang sa Kalig-on sa mga Kabatan-onan*, Abr. 2021, 31)